



FONDACIJA
ZA BIBLIOTEČKU
DJELATNOST
SARAJEVO

Na osnovu člana 24. Zakona o zaštiti od požara i vatrogastvu ("Službene novine Federacije BiH", broj 64/09) i člana 8. Statuta Fondacije za bibliotečku djelatnost V broj: 539/08, br. 02-111/09 i 02-178/09, Upravni odbor Fondacije za bibliotečku djelatnost, na 83. sjednici održanoj 27. 3. 2015. godine, d o n o s i

P R A V I L N I K
o zaštiti od požara

I OPĆE ODREDBE

Član 1.
(Predmet)

Ovim Pravilnikom uređuje se skup mjera i aktivnosti za sprječavanje izbijanja i širenja požara; spašavanje ljudi i materijalnih dobara; prava, obaveze i odgovornosti u slučaju izbijanja i prilikom otklanjanja požara, kao i druga pitanja vezana za organizaciju, unaprjeđenje i poduzimanje preventivnih mjera zaštite od požara u Fondaciji za bibliotečku djelatnost (u daljnjem tekstu: Fondacija).

Član 2.
(Organizacija)

(1) Organizacija i provođenje zaštite od požara u Fondaciji vrši se u skladu sa Zakonom, Planom zaštite od požara Federalnog ministarstva kulture i sporta (u daljnjem tekstu: Ministarstvo) i ovim Pravilnikom.

(2) Upravni odbor i zaposleni u Fondaciji učestvuju u provođenju i unaprjeđenju mjera zaštite od požara u skladu sa Zakonom, Planom zaštite od požara Ministarstva i ovim Pravilnikom.

Član 3.
(Zaštita od požara)

(1) Zaštita od požara se organizuje i provodi na svim mjestima i u svim prostorijama gdje postoji opasnost od izbijanja i širenja požara.

(2) Zaštita od požara obuhvata skup mjera i aktivnosti koje se utvrđuju i poduzimaju u cilju sprječavanja izbijanja i širenja požara, otkrivanja, lokalizacije i gašenja požara, te spašavanja ljudi i materijalnih dobara ugroženih požarom.

Član 4.
(Ovlaštene osobe)

Upravni odbor i ovlaštene zaposlenice organizuju zaštitu od požara i staraju se o provođenju propisanih mjera zaštite od požara i vrše druge poslove određene u cilju unaprjeđenja zaštite od požara u Fondaciji.

Član 5.
(Obaveza primjene Pravilnika)

Odredbe ovog Pravilnika obavezuju pored Upravnog odbora i zaposlenika Fondacije i sva ostala lica koja se po bilo kojem osnovu zateknu u prostorijama koje Fondacija koristi u zgradi Ministarstva.

II ZAŠTITA OD POŽARA

Član 6.
(Plan zaštite od požara)

Fondacija koristi Plan zaštite od požara Ministarstva.

Član 7.
(Odgovornost zaposlenika)

Zaposlenici Fondacije odgovorni su za neposredno izvršavanje zadataka iz oblasti zaštite od požara, za pružanje prve pomoći i spašavanje zaposlenika i materijalnih dobara ugroženih požarom.

Član 8.
(Poslovi koordinacije)

Zaposlenici Fondacije obavljaju poslove i aktivnosti iz oblasti zaštite od požara u koordinaciji sa Ministarstvom.

Član 9.
(Vatrogasne sprave)

- (1) Sve vatrogasne sprave, aparati za gašenje požara i hidranti moraju da budu u ispravnom stanju i moraju se nalaziti na tačno određenom mjestu.
- (2) Mjesta gdje se nalaze vatrogasne sprave moraju biti vidno označena posebnim oznakama.
- (3) Prilaz vatrogasnim spravama mora da bude obezbijeđen i zabranjeno je da se zatrpavaju bilo kakvim materijalom koji bi otežao njihovo aktiviranje.

III POSEBNA PRAVA, OBAVEZE I ODGOVORNOSTI IZ OBLASTI ZAŠTITE OD POŽARA

Član 10.
(Stručna obuka)

Stručno obučavanje i osposobljenost zaposlenika iz oblasti zaštite od požara provodi se na svim poslovima i za sve zaposlenike u skladu sa programom obučavanja Ministarstva.

Član 11.
(Prava i obaveze zaposlenika)

Svaki zaposlenik ima pravo i obavezu da:

- se upozna sa odredbama ovog Pravilnika prilikom stupanja na rad;
- se upozna sa sredstvima za gašenje, njihovim rasporedom, te sa postupkom u slučaju požara;
- opremu za gašenje čuva, ne zatrpava, ne oštećuje i ne otuđuje;
- prisustvuje obuci i provjeri znanja iz zaštite od požara koju organizuje Ministarstvo;
- obavijesti neposrednog rukovodioca ukoliko primijeti neki nedostatak koji bi mogao izazvati požar;
- prilikom rada na svom radnom mjestu poštuje tehnološki proces i sve mjere zaštite od požara;
- poštuje znakove upozorenja i požarne puteve održava čistim, kao i nužne izlaze i prilaze aparatima za gašenje požara;
- u slučaju požara pokuša raspoloživim sredstvima ugasiti požar, a ako nije u mogućnosti tražit će pomoć od neposrednog rukovodioca;
- se pridržava uputstva za rad na siguran način sa stanovišta zaštite od požara i uputstva neposrednog rukovodioca i
- svoje poslove i radne zadatke obavlja prema tehničkim i drugim uputstvima, u skladu sa namjenom opreme i u skladu sa ovim Pravilnikom.

Član 12.
(Odgovornost zaposlenika)

Zaposlenik je naročito odgovoran ako:

- ne sprovodi propisane mjere zaštite od požara u određenom roku, iako uslijed toga nisu nastupile štetne posljedice;
- ne pridržava se utvrđenih propisanih i navedenih uputstava za siguran rad sa stanovišta zaštite od požara i eksplozija;
- nepravedno i bez potrebe daje znak za požar i bez opravdanog razloga odbija da učestvuje u gašenju požara;
- neodgovorno postupa sa opremom za otkrivanje i gašenje požara;
- ostavlja eksplozivne materije i potpaljuje tečnosti i gasove na mjestima koja za to nisu izričito određena.

Član 13.
(Povreda dužnosti)

Ukoliko se zaposlenik ne pridržava mjera zaštite od požara i ovog Pravilnika odgovara za povredu radne dužnosti.

IV POSTUPAK U SLUČAJU POŽARA

Član 14. (Gašenje požara)

(1) U slučaju izbijanja požara, zaposlenik koji je primijetio požar, dužan je pristupiti gašenju požara, ukoliko je u mogućnosti da to učini bez opasnosti za svoj život ili život drugih zaposlenika ili lica koja se zateknu u prostoru dejstva požara.

(2) Ostali zaposleni u objektu ili odjeljenju također su dužni pomoći prilikom gašenja požara ako to mogu učiniti bez opasnosti za sebe ili druge prisutne osobe.

Član 15. (Pozivi u slučaju požara)

(1) Prilikom uočavanja požara potrebno je uzvikom POŽAR! uzbuniti ostale zaposlenike.

(2) Kada prisutni zaposlenici nisu u mogućnosti da sami ugase požar, dužni su nakon brze procjene pozvati dežurnog portira, odnosno neposrednog rukovodioca i najbližu profesionalnu vatrogasnu jedinicu ili policijsku stanicu, a prema Planu zaštite od požara Ministarstva.

Član 16. (Način dojave)

(1) Dojava požara vrši se telefonom, i to na broj 123 za profesionalnu vatrogasnu jedinicu i 122 za policijsku stanicu.

(2) Prilikom obavještanja o požaru potrebno je javiti sljedeće:

- mjesto gdje je požar izbio,
- obim požara, odnosno stepen opasnosti,
- ime i prezime zaposlenika koji javlja o požaru.

Član 17. (Spašavanje)

(1) Prilikom izbijanja požara najhitnije se poduzimaju mjere spašavanja zaposlenika, ukoliko je njihov život u opasnosti, a zatim imovine ugrožene požarom.

(2) Ako uslijed požara nastupi povreda zaposlenika, najbržim putem će se obavijestiti najbliža zdravstvena stanica.

Član 18. (Ostale aktivnosti u slučaju požara)

(1) Nakon što se uoči požar potrebno je obezbijediti isključenje struje u objektu.

(2) Kako bi se spriječilo širenje požara potrebno je, ukoliko je to moguće bez izlaganja opasnosti, pristupiti zatvaranju vrata, prozora i drugih otvora.

Član 19.
(Rukovođenje akcijom gašenja)

Gašenje požara provodi zaposlenik koji je prvi primijetio požar i započeo njegovo gašenje, a po dolasku vatrogasne jedinice rukovođenje akcijom gašenja požara predaje komandiru vatrogasne jedinice.

V MJERE ZAŠTITE OD POŽARA

Član 20.
(Mjere zaštite)

U cilju sprječavanja, izbijanja i širenja od požara, spašavanja zaposlenika i imovine ugrožene požarom poduzimaju se mjere zaštite od požara.

Član 21.
(Oprema za gašenje)

- (1) Broj, vrsta i raspored sredstava i druge propisane opreme za gašenje požara određuje se Planom zaštite od požara Ministarstva.
- (2) Predviđeni uređaji, oprema za gašenje požara i signalizacija postavljaju se na vidna i pristupačna mjesta i istim pristup mora biti uvijek omogućen.
- (3) Uređaji, oprema, sredstva za gašenje požara, kao i uređaji za dojavu požara mogu se koristiti samo u slučaju požara.
- (4) U slučaju upotrebe aparata za gašenje požara, hidranata ili javljača požara, kao i eventualnom oštećenju istih, zaposlenici su dužni obavijestiti neposrednog rukovodioca.

Član 22.
(Postupanje sa elektro-materijalima i uređajima)

Zabranjeno je svako zatrpavanje bilo kojim materijalom razvodnih električnih kablova, elektro-ormara i sklopki, kao i improvizovano spajanje i izolovanje električnih kablova i drugih elektro uređaja u Fondaciji.

Član 23.
(Upotreba uređaja koji oslobađaju toplotnu energiju)

- (1) U Fondaciji je zabranjena upotreba grijalica, rešoa i drugih uređaja koji oslobađaju toplotnu energiju.
- (2) Izuzetak od prethodnog stava su prostorije u kojima ne postoji drugi način zagrijavanja, pod uslovom da uređaji koji oslobađaju toplotnu energiju imaju termo regulator i odgovarajuću zaštitu.

Član 24.
(Održavanje čistoće)

Poslije završetka radnog vremena obavezno je čišćenje radnih i pomoćnih prostorija, mašina i uređaja, te isključenje električnih i plinskih instalacija.

Član 25.
(Protivpožarni put)

(1) Požarni putevi moraju biti obilježeni oznakom «POŽARNI PUT» u skladu sa Planom zaštite od požara Ministarstva.

(2) Na unutrašnjim i vanjskim požarnim putevima, kao i na nužnim izlazima i stepeništima ne smije biti nikakvog materijala i isti uvijek moraju biti prohodni.

VI ZAVRŠNE ODREDBE

Član 26.
(Primjena ostalih propisa)

U pogledu pitanja koja nisu regulisana odredbama ovog Pravilnika, a koja se odnose na zaštitu od požara, primjenjivat će se Zakon o zaštiti od požara i Plan zaštite od požara Ministarstva.

Član 27.
(Stupanje na snagu i primjena)

Ovaj Pravilnik stupa na snagu danom donošenja i primjenjivat će se od 1. 4. 2015. godine.

Broj: 1-01-1-29/15
Sarajevo, 27. 3. 2015. godine

PREDSJEDNIK
UPRAVNOG ODBORA

Miro Petrović